

Señor mr. Leo Maduro di KvK:

Ciere di refineria a causa ciere di otro negoshinan den e distrito di San Nicolas



ORANJESTAD (AAN) – Matutino DIARIO a entrevista señor mr. Leo Maduro, funcionario di Camara di Comercio y Industria, tocante e cantidad di negoshinan cu ta habri of ta cera den e trayecto di e aña y su proceso di registracion den KvK.

Den e contexto aki mr. Leo Maduro a referi na e ciere di e refineria y su efectonan riba otro negoshinan na San Nicolas, y con esaki a trece consecuencia pa henter nos economia.

Señor Leo Maduro a indica cu aworaki KvK ta den e proceso di registracion di negoshi nobo cu ta mas of menos 1200 anualmente. Aña pasa tabata tin un average di 900 empresa cu a cera nan porta.

Locual nan ta mira ta e fenomeno cu tin negoshi

cu realmente no ta existi mas pero ta te ora nan haya nan mes cu e gasto di e contribucion anual, tin biaha cuater of cinco aña despues cu e negoshi a cera, cu nan ta bin kita nomber for di Camara di Comercio. Pesey ta hopi dificil pa bin cu cifra cuanto negoshi di berdad ta cera den un aña.

Si ta bisto pa tur hende, señor mr. Maduro a subraya, cu despues di e ciere di e refineria e negoshinan cu di un of otro manera tabata biba di e industria aki, pasobra nan tabata abastece sea e refineria mes of e trahadornan/ contratista, tambe a perde nan negoshi.

Señor mr. Leo Maduro a indica cu esaki tabata tin su efecto riba empleo na nos pais, no solamente na San Nicolas pero den e otro distritonan tambe, pasobra

hopi biaha tin e impresion cu mayoria di e trahadornan di Valero y e contratistanan ta biba na San Nicolas, of cerca di e distrito pero esey no ta berdad.

Señor Maduro a indica cu ciere di e refineria tabata un golpi extra pa e refineria, y pesey Camara di Comercio y Industria a pone enfasis pisa riba e necesidad di un plan general di reactivacion economico di nos pais, y nan ta mira un respuesta den e sentido cu den e Dia- logo Social a keda acorda cu nan ta bin cu un plan asina atravez di un regimen special, pa companianan cu ta establece na San Nicolas, den forma di un rebaha di impuesto riba ganashi.

E pregunta grandi cu ta keda pa Camara di Comercio y Industria ta kico ta bay sosode cu e tereno inmenso di e refineria cu por wordo uza pa un cantidad grandi di diferente actividad economico y no solamente pensa riba un. Esey ta solamente posible si gobierno ta adkiri e tereno den su totalidad y trece bao un compania nacional di desaroyo pa San Nicolas, y djey cumenza diversifica cu diferente ac-

tividad economico.

Señor mr. Leo Maduro a menciona cu nunca Aruba (den pasado tampoco) a conoce un plan di contingencia pa e tipo di situacionnan aki y simplemente a lague pa esun cu por sobrevivir y esun cu, no give up; y esaki ta dificil pa drecha.

Locual Camara di Comercio y Industria ta kere ta cu na nivel di banconan si a haci

algo, den sentido cu ora un banco ta otorga un prestamo na un empresa y esaki ta menaza di bay cera porta, y cu nan ta core riesgo cu e placa no ta bin back pa nan, nan a bin cu cierto flexibilidad den un situacion economico dificil asina.

Esaki na discrecion di e banco, cu den contacto directo cu e cliente sea pa yega na un areglo mutuo, of no.

Telefonnan di
DIARIO 582-6747
Fax 582-8551